

Feschted zum Jubiläum 50 Jahr TV Burgistein

Autorin: Rita Gilgen, Präsidentin TV

Liebi Gescht

Es fröit mi sehr, Öich so zauriich dörfe z'begrüesse. Wi dir aui wüsst, darf dr Turnverein zäme mit em Schiklub dr 50. Geburtstag fyre. 50 Jahr isch doch scho e schtouzi Zau u uf die 50 Jahr wie mir itz zäme zrüggluege.

1957 isch üse Verein vo 10 Mitglieder im Rest. Bahnhof gründet worde. Das si denn gsi: Aebischer Werner, Brunner Otto, Däppen Karl, Grädel Albert, Iten Arnold, Käser Erwin, Käser Gottfried, Probst Hans, Stähli Martin u Stalder Peter. Es paar vo däne Gründigsmittglieder si hüt awäsend was üs sehr fröit.

Scho im Dezämber 1957 si mir im Weschtamtturnvürband ufgno worde u grad beuffreit für 1958 dr Weschtamtturntag dürezfüere. Im gliche Jahr isch z'erschte Tenu agschaffet worde. Das isch denn gsi: es grüens Trikot u schwarzi Hose mit rote Schtreife uf dr Site. Äbefaus im däm Jahr isch dr TV am oberl. Turnverband agschlosse worde. Scho 1959 hets di erschti Jugendriege gä. Denzumau het me no ke Turnhaue gha hie z'Burgischtei, nei – die hei no ganz anders turnet. Aus erschte Turnruum het ir ungere Öli d'Yfahrt dienet - da wo hüt Hadorns daheime si – bis der Ruum ir Graströchnigsalag het chönne bezoget wärde. Vor Schueubehörde si Barre u Pferd zur Verfüegig gschteut worde u dür Fronarbeit isch ar Gürbe usse die erschti Wytschprungalag entschtange.

Afangs 60er Jahr isch de z'Tränig i z'Schueuhus Weierbode vürleit worde. Bi schlächtem Wätter het me ir sogenannte Chuchi im erschte UG - dert isch hüt dr Chindergarte - u i de Gäng turnet. I bsinne mi no guet a z.B. z'Schprungbrätt u de Schuumgummibitze wo imene Tarnnetz vom Militär aus Matte dienet hei. Aber scho denn hei si traniert uf nes Zju häre. Dr Bunt Abe isch nume 1 Bischpiu. Mi het a viune Sache mitgmacht, a vürschidene Löif u Wetttkämpf. 1965 hei si scho am Oberländische Turnfescht Gstaad mitgmacht u im Juni 1966 het dr Turnvürein sogar e Gländelouf organisiert.

So isch o dr Gedanke fürne Vüreinsfahne ufcho u isch grad uf guets Echo gschtosse. Auso het me e Fahnefonds eröffnet u mit Ylage gnährt. 1966 isch dr Uftrag zur Härchtellig vo üser Fahne gä worde. 1967 isch Fahneweih gsi mit de Göttis: TV Bluemischei u TV Seftige. Mit emene bunte Umzug u Musigkläng vom Rest. Linde zum Schueuhus Weierbode, z'Fuess oder zu Pferd, Turnerschar i wyssem Gwand, mit Asprach vom Gmeinspresidänt Mürger, isch die Fahne ygweiht worde.

1972 hets e nöie Trener gä: Adidas, rot-wyssi Hose u rot-wyssi Jagge. I de 70er Jahr si vürschideni Aktivturner zrüggräte u es isch e Lücke entschtange. Mit Fliiss u Beschändigkeit isch ar Basis mit jüngere Turner erfougrich aufboue worde. Der Nöibou vom Schueuhus mit Mehrzwäckhaue hie im Burgiwil, mit Rohboufescht 1980 het em Vürein guet ta. Näbscht dr Schueu hei o d'Schportvüreine chönne die Haue bruuche. Dr TV het am 15.7.81 e usserordentlichi Houptvürsammlig gha u die nöie Schtatute gnämiget. Vo denn a hei im Turnvürein o di erschte Froue turnet. Ar HV 1982 isch Dameriege wie o d'Männerriege i TV ufgno worde. O d'Nachwuchsförderig het

Frücht treit u mir hei 1985 d'Jugi ufteilt i Meitschi- u Gieleriege. No im gliche Herbscht isch z'Muki u Kitu derzue cho.

Sit 1979 isch unungerbroche a Vürband- u Kantonalturmfescht teilgno worde. 1984 z'Winterthur isch üse Turnvürein zerschtmaw amene Eidgenössische Turnfescht gsi. 1987 isch de der grau-blau-wyss Adidas Trener cho, es paar hei dä geng no. 1991 isch äüä die gröschti Schar i üser Gschicht amene Eidgenössische Turnfescht gsi. Es hei sech denn 44 Lüt agmäudet. Das isch es Turnfescht gsi wo hüt no i gueter Erinnerung isch. Mit Fliiss hei aui Riege trüniert u es si geng me worde i üsem Turnvürein. Mitti 90-er Jahr si die beide Jugendriege angers zämegschteut worde. Statt Meitschi u Giele hets Jugi chli u -gross gä u sit paar Jahr si sogar no e Jugi chly. 1999 isch när bir Dame-riege z'Bedürfniss ufcho für ne wyteri Riege u so isch d'Froueriege entschtange. So si mir hüt fougendi Riege: Aktivi – Männerriege – Dameriege – Froueriege – Jugi chli – Jugi mittu u Jugi gross – zuesätzlech im Winterhaubjahr Kitu u Muki. Mir gö o hüt regu-mässig mit fasch aune Riege a Wettkämpf wi dr Frühligswettkapmf z'Amsudinge, a nes Oberländisches, a nes Eidgenössisches u a Weschtamtturntag u ändi Saison gits de no d'Riegemeischterschafte. Äs wüsse auso aui für was das si i z'Training gö. Aber mir si nid nume für z'Turne da. Mir hei sicher e wichtegi Ufgab ir Jugendarbeit, Gselligkeit u Kameradschaft hei äbefaus e grosse Schteuewart u nid z'letscht tuets eifach guet we me sech bewegt us derzue no lueschtig het. Mir lade aui hie inne wo mau wei cho ineluege hätzlech i nes Schnuppertraining i. Dir chöit eifach cho ineluege. Wär wenn ir Haue isch chöit dir gärn eifach öpper vo üs frage.

Sötts no Settigi ha wo kes Tschöppli hei u gärn eis wette, bi üs isch d'Jugi gross u d'Froueriege no uf dr Suechi nach nöie Leiter.